

Lain grischun e ses niz multifar

Tema da la novissima «Terra Grischuna»

■ (anr/gc) L'edizium 2/2016 da la «Terra Grischuna» (TG) – era la revista da buna reclama per noss chantun – sa fatschenta extendidamain cun la muntada dal lain en e per il Grischun e descriva era ses niz e diever multifar. Punctuà vegn ch'il guaud saja da vegl ennà stà da muntada existenziala per il Grischun sco furnitur da laina, element marcant da la cuntrada e surtut per proteger da privels da la natira. El saja uschedadir era l'origin dad ina chadaina per ina impurtanta creaziun da valor.

En il Grischun datti ca. 2300 persunas occupadas en l'industria locala da laina. En tut èsi era radund 1600 resgiaders, lainaris, scrinaris e transportaders. Vitiers vegnan anc 700 inschigners forestals, selviculturs e blers lavurers da guaud, occupads cun la tgira da quel. 85% dal guaud appartegnan en il Grischun a las vischnancas politicas. Il lain serva era per producir energia renovabla. Avant na tant lung temp era la laina l'element principal per la construcziun da chasas sin mirs massivs – exceptè en citads ed insaquants vitgs dal Tessin, Giura ed en il Grischun meridional.

Divers objects, fabritgads or da lain

La scarsola da lain da Tavau ha prest conquistà l'entir mund. In temp era ella tant sco



svanida. Oz percenter vegn ella puspè introducida en pitschnas serias – sa chapescha anc adina fatg tut a maun.

Er ils fabritgants grischuns d'instruments dovran pli e pli il lain. Uschia èsi era tar *Claudio Pagelli*, a Scharons, che construescha or da lain cun success ghitaras. Ses enconuschent collega è *Werner Schär*, d'Andeer. Era datti la giuvna manufactura da clavazins Piano Rätia a Tavau. Dad al-

legar èn las creativas scrinarias da mobiglias, tant en stil tradiziunal sco segund design innovativ.

Giubileum e rar mastergn

Il «Club 1889» a Samedan po festivar ses 20. anniversari. En atgna reschia lascha el reparar custaivels vehichels da la Viafier retica. Commemorà vegni quest atun cun ina festa populara. – En il territori alpin existan anc oz brischavinars, in mastergn da lunga tradiziun. Oravant tut è quai il cas en regiuns rumantschas sco a Surrein (famiglia Candinas) e Schnaus (*Peder Caspescha*).

Purtret simpatic

Propi reussì è il purtret cun *Edy Walser*, Sievgia (Seewis), ch'è ina giada allevatur da chavals, ma era pur ed in collega zunt apprezzià sco collavuratur dal «Bündner Tagblatt». El ha fatg in pau dal tut en sia vita. Sa spezialisà è el dentant sco correspondent principalmain sin la sparta agrara. Il radius da ses interess tanscha dentant lunsch viaden en tematicas istoricas e d'interess actual. Ses stil schurnalistic sa distingua tras ina nota zunt persunala. Quai èn be paucs sguards en la novissima «Terra Grischuna». Quella legian ins adina tgunsch e gugent, essend ch'ella sa preschenta era graficamain fitg bain.